

Sidang Kemuncak ASEAN pacu transformasi serantau menjelang 2045

• Visi Komuniti ASEAN 2045 amat penting untuk membawa rantau ini terus melangkah ke hadapan dalam kerencaman geopolitik dunia dengan meletakkan ASEAN sebagai pusat keamanan, keselamatan dan kerjasama ekonomi serantau

• Kehadiran lebih 2,000 delegasi rasmi dan 300 wartawan antarabangsa ke Sidang Kemuncak ASEAN ini mampu tingkat pelaburan diplomatik jangka panjang, mempromosi Malaysia sebagai tuan rumah mesra pelabur dan pelancong, selain menambah nilai ekonomi tempatan



Dekan Pusat Pengajian Antarabangsa (SOIS), Kolej Undang-Undang, Kerajaan dan Pengajian Antarabangsa (COLGIS), Universiti Utara Malaysia (UUM)

Oleh Prof Malya De Nascarella
bhrencana@bh.com.my

Sidang Kemuncak ASEAN Ke-46 yang berlangsung di Kuala Lumpur pada 26 dan 27 Mei ini, bukan sekadar perhimpunan diplomatik tahunan, tetapi landasan strategik bagi memacu transformasi rantau ASEAN menjelang 2045.

Malaysia sebagai Pengerusi ASEAN 2025 memikul tanggungjawab besar bukan sahaja dalam membentuk agenda serantau, bahkan menegaskan kepentingan nilai inklusif, keselamatan, kemampanan dan kesejahteraan rakyat ASEAN secara menyeluruh.

Pelancaran Visi Komuniti ASEAN 2045 adalah antara agenda penting sidang ini. Dokumen strategik

ini akan membentuk hala tuju ASEAN bagi tempoh dua dekad yang akan datang.

Visi ini menyasarkan ASEAN menjadi sebuah komuniti lebih teguh dari aspek politik dan keselamatan, inklusif dan mampan serta berdaya saing dalam ekonomi digital.

Visi ini amat penting untuk membawa rantau ini terus melangkah ke hadapan dalam kerencaman geopolitik dan geoeкономи dunia dengan meletakkan ASEAN sebagai pusat keamanan, keselamatan dan kerjasama ekonomi serantau.

Pendekatan ini membolehkan ASEAN berinteraksi secara konstruktif dengan kuasa besar dunia sambil mengekalkan kebebasan serta mempromosi kestabilan serantau.

Sidang kemuncak ini juga dijangka menyentuh isu penipuan pekerja rentas sempadan sebagai satu bentuk pemerdagangan manusia moden. Kajian Pertubuhan Bangsa-Bangsa Bersatu Mengenai Dadah dan Jenayah (UNODC) pada 2023 mendapati lebih 200,000 rakyat ASEAN terperangkap dalam sindiket penipuan pekerja, kebanyakannya di Myanmar dan Kemboja.

Antara kes terkini dilaporkan ialah kes Cyber Scam Compounds di Myawaddy, Myanmar membatikan 1,200 mangsa dari Malaysia, Indonesia dan Vietnam yang dipaksa bekerja di pusat penipuan siber.

Bagi pumam itu, Malaysia mencadangkan mekanisme pemantauan serantau, penggunaan teknologi rantaian blok untuk penjejakan pekerja migran dan kerjasama ASEAN dengan Interpol serta Suruhanjaya Tinggi Pertubuhan Bangsa-Bangsa Bersatu bagi

Pelarian (UNHCR) bagi menangani isu ini.

Data daripada ASEAN Digital Integration Index pula menunjukkan ASEAN kini menjadi rantau pengguna digital terbesar di dunia dengan lebih 460 juta pengguna internet.

Serentak dengan itu, keselamatan siber menjadi isu semakin mendesak di rantau ini dengan banyak serangan siber, termasuk insiden ransomware 2023 yang melumpuhkan sistem hospital di Singapura dan universiti di Indonesia.

Pusat data serantau

Oleh itu, Malaysia mencadangkan pembentukan ASEAN Cybersecurity Taskforce dan pelaksanaan rangka kerja ASEAN Digital Trust Framework. Perkembangan ini selaras dengan pelaburan digital seperti Amazon Web Services bernilai RM25.5 bilion di Malaysia.

Pada masa sama, penempatan pusat data serantau akan memperkukuhkan kedudukan Malaysia sebagai hab teknologi.

Krisis Myanmar juga terus menjadi titik tekanan kepada solidariti ASEAN. Walaupun Konsensus Lima Perkara dicapai pada 2021, kemajuannya sangat perlahan.

Isu ini menguji dasar 'tidak campur tangan' ASEAN dan Malaysia menggesa penyesuaian kepada pendekatan *constructive engagement with consequences*.

Antara cadangan dijangka dikemukakan Malaysia ialah pelanjutan dan peluasan gencatan senjata sedia ada di Myanmar. Pada masa sama, Malaysia bercadang menganjurkan satu persidangan ikrar sumbangan (*pledging conference*) bagi bantuan kemanusiaan dan pembangunan semula Myanmar pasca gempa bumi.

Dalam hubungan ASEAN dengan negara luar, data Tabung Kewangan Antarabangsa (IMF) setakat Oktober 2024 merekodkan gabungan ASEAN Majlis Kerjasama Teluk (GCC)-China kini entiti ekonomi mewakili 22.58 peratus daripada Keluaran Dalam Negeri Kasar (KDNK) global berjumlah AS\$24.87 trilion (RM105.9 trilion). Ia melibatkan populasi gabungan kira-kira 2.15 bilion orang, ASEAN-GCC-China merupakan antara ekonomi terbesar di dunia.

Skala ekonomi luas ini menawarkan potensi besar untuk memperkukuh kerjasama dalam bidang perdagangan, pelaburan dan inovasi antara ketiga-tiga pihak. Melalui kerjasama strategik seperti Sidang Kemuncak ASEAN-GCC-China, ASEAN berpeluang memperluaskan akses pasaran, menarik pelaburan

bernilai tinggi, serta meningkatkan daya saing serantau, selari dengan aspirasi jangka panjang ASEAN untuk menjadi ekonomi keempat terbesar dunia menjelang 2030.

Sidang Kemuncak ASEAN-GCC-China yang dijadualkan pada 27 Mei akan memperkukuh kedudukan ekonomi rantau dan mengurangkan keberangtungan kepada pasaran tradisional.

Fokus utamanya adalah ke arah pengukuhan perdagangan dan pelaburan antara ASEAN, GCC dan

China. Ia juga akan membincangkan mitigasi ketegangan perdagangan yang ASEAN akan memanfaatkan hubungan ini bagi meningkatkan tarif perdagangan AS terhadap China. Selainnya adalah pelaburan tenaga boleh diperbaharui di mana projek ASEAN-GCC Green Energy Corridor sedang dirunding.

ASEAN juga akan memperkukuh inisiatif ASEAN Smart Cities Network yang kini membabitkan 30 bandar dari 10 negara, termasuk Kuala Lumpur, Johor Bahru dan Kota Kinabalu untuk menyelaraskan pembangunan bandar pintar di seluruh rantau.

Fokus akan diberikan kepada integrasi teknologi dalam pengurusan bandar, peningkatan daya tahan bandar terhadap perubahan iklim serta

penggunaan tenaga boleh diperbaharui dan perlindungan biodiversiti. Begitu juga dengan gagasan ASEAN Urban Green Plan 2035.

Dari sudut lain, kehadiran lebih 2,000 delegasi rasmi dan 300 wartawan antarabangsa ke Sidang Kemuncak ASEAN ini bukan sekadar memeriahkan suasana, tetapi mampu meningkatkan pelaburan diplomatik jangka panjang, mempromosi Malaysia sebagai tuan rumah yang mesra pelabur dan pelancong, selain menambah nilai ekonomi tempatan.

Sebahagian warga kota mungkin sudah atau akan terkesan dengan penutupan beberapa jalan utama dan kawalan keselamatan yang lebih ketat sepanjang Sidang Kemuncak ASEAN ini berlangsung.

Namun, semua perlu faham pengorbanan kecil ini amat diperlukan kerana ia akan membawa pulangan strategik besar kepada imej dan kedaulatan negara.

Semua artikel penulis tamu adalah pendapat peribadi, bukan pendirian rasmi BH

